

समे – 12:25 hrs.

<><><><><><>

PM-Kissan Samman

प्रधानमंत्री नरेन्द्र मोदी होरें अपने संसदी हलके वाराणसी च अज्ज आयोजित इक कार्यक्रम दरान किसान सम्मान निधि दी 20मीं किशत जारी कीती। एहदे अलावा श्री मोदी होरें 2 जहार 200 करोड़ रुपें दिएं 52 विकास परियोजनाएं दा उद्घाटन कीता ते केई परियोजनाएं दा नीह पत्थर बी रक्खेआ। इस मौके पर श्री मोदी होरें जनसभा गी संबोधित करदे होई आखेआ जे उं'दी सरकार, करसानें दे जीवन च बदलाव आहनने, करसानें दी औंदन बधाने ते खेती पर होने आहले खर्च गी घट्ट करने लेई पूरी ताकत कन्नै कम्म करै करदी ऐ। इस मौके पर पहलगाम च 22 अप्रैल गी होए दे आतंकी हमले मगरा भारत आसेआ चलाए गेदे आपरेशन सिंदूर दा जिक्र करदे होई श्री मोदी होरें आखेआ जे 140 करोड़ देशवासियें दी एकता गै आपरेशन सिंदूर दी ताकत ऐ।

<><><><><><>

LG Army Officers

फौज दे त्रौनैं सीगें दे अधिकारिणं दा शानदार प्रदर्शन ते नागरिकें दी सुरक्षा जकीनी बनाने लेई उं'नेंगी अभार, धन्नवाद ते ममारकबाद दिंदे होई उपराज्यपाल मनोज सिन्हा होरें आखेआ जे असें सब्भनैं गी हर इक आतंकवादी ते आतंकी संगठन दा समूलचा नाश करने दा पक्का धेइया करना लोइचदा तांजे स्हाड़ी सुरक्षा ते खुशहाली लेई हर खतरे गी दूर कीता जाई सकै। कल राजभवन श्रीनगर च उं'नेंगी मिलन आए दे 'आर्मी वार कालेज माहू' दे अधिकारिणं ते शिक्षण अमले गी संबोधित करदे होई उनें एह गल्ल आखी।

<><><><><><>

Kulgam-Encounter

कश्मीर दे कुलगाम जिले च अज्ज बड्डलै अखल देवसर इलाके च होए दे टाक्करे च सुरक्षाबलें इक आतंकवादी गी मारी-मुकाया ऐ। इलाके च आतंकवादिएं दी मजूदगी बारै इक पक्की सूह थोने परैन्त सुरक्षाबलें आसेआ कल संझां चलाए गेदे अभियान दरान एह टाक्करा शुरु होआ हा। फौज, जम्मू-कश्मीर पुलिस ते केन्द्री रिजर्व पुलिस बल आसेआ सांझे तौर पर चलाए गेदे इस अभियान दरान जंदी रातीं लगातार दपक्खी गोलीबारी हुंदी रेई। होर ब्यौरे गी अजें बलगेया जा'रदा ऐ।

<><><><><><>

JK Landslide

रियासी जिले च कल होए दे हादसे च इक एसडीएम ते उंदे पुतरै दी मौत होई गई। पुलिस मूजब एह हादसा उसलै पेश आया जिसलै एसडीएम रजिंदर सिंह राणा होर अपने परोआर कन्नै धरमाड़ी थमां अपने जद्दी गां बक्खी जा'रदी हे। रस्ते च प्हाड़ परा इक बड्डा कुप्पड़ उंदी गड्डी पर आई डिग्गा जिस करी राणा ते उंदे पुतर हुंदी मौके पर गै मौत होई गई। हादसे च जख्मीं होए दे होरनें जनें दा इलाज चलै करदा ऐ। लेफ्टिनेंट गवर्नर मनोज सिन्हा ते मुखमन्त्री ओमर अब्दुल्ला होरें भंदे भागें आहली इस घटना पर दुक्ख ते बसोस बुज्झोआ ऐ।

<><><><><><>

Citizen-Centric Services

आम नागरिकें गी दिती जाने आहिलिएं सेवाएं च बेहतरी आहनने दी दिशा च इक महत्वपूर्ण गैह पुट्टदे होई विधि, न्यास ते संसदी मामलें सरबन्धी मैहकमे नै जम्मू-कश्मीर दे मुख सचिव अटल डुल्लू होरें'गी इत सरबन्धी नमीं-नमीं पैहलकदमी बारै जानकारी सांझी कीती। एह पैहल 10 बक्ख-बक्ख प्रारूपें च तैयार कीती गेदी इक बवस्था ऐ जेदे राएं आम लोकें दी न्यायिक सेवाएं तोड़ी सैहज ते सखल्ली पुज्ज यकीनी बनदी ऐ। इस बवस्था तैहत आम लोकें दी न्यायिक सेवाएं तोड़ी पुज्ज, परामर्श, सलाह, सहायता ते मदाद यकीनी बनोग ते प्रदेश ते जिला सतह पर कनूनी सेवा प्राधिकरणें कन्नै संपर्क राबिता बी सखल्ला बनोग। मोबाइल ऐप दी शक्ली च तैयार कीती गेदी इस पैहल कन्नै केंद्र ते यू.टी दे नियमें-प्रावधानें, अधिसूचनाएं ते कनून मैहकमें दी वेबसाइट ते कन्नै इंडिया कोड वेबसाइट तोड़ी लोकें दी पुज्ज बी सखल्ली बनी सकोग।

<><><><><><>

CS-JK Samdhan

मुख्य सचिव अटल डुल्लू होरें जन शकैत मैहकमे दी कारकरदगी ते छमता दा जायजा लैने लेई इक बैठक सददी जेहदे च जे.के समाधान ते सी.पी ग्राम पोर्टल दी मदाद कन्नै किस हद्दे तगर लोकें दिएं दिक्कतें गी दूर करने च कामयाबी हासल होआ करदी ऐ, एहदे बारै जानकारी हासल कीती गई। बैठका च प्रशासनिक सचिव ते मैहकमे दे वरिष्ठ अधिकारिणें केंद्र शासित प्रदेश दे बक्ख-बक्ख हिस्सें थमां वर्चुअल ढंगै कन्नै शिरकत कीती।

<><><><><><>

Har Ghar Tiranga

हर बारी आहला लेखा इस बारे बी मुख्य दे बाकी हिस्सें आडर जम्मू-कश्मीर च बी स्वाधीनता दिवस दे सिलसिले च हर घर तिरंगा अभियान चलाया जा'रदा ऐ जेड़ा अजादी आहले ध्याड़े यानि 15 अगस्त तोड़ी जारी रौहग। इस सिलसिले च कल उधमपुर, रामबन ते किश्तवाड़ जिले च सरबंधित डिप्टी कमिशनरें ते कठुआ जिले च अतिरिक्त डिप्टी कमिशनर होरें जिला मुख्यालय च हर घर तिरंगा अभियान दे आयोजन बारै सलाह-सूत्र कीता। इ'नें बैठकें च इस आयोजन दे बक्ख-बक्ख पैहलुएं पर तफ्सीली सोच-बचार कीता गेआ जे किस चाल्ली कन्नै बक्ख-बक्ख गेइं च इस मुहिम दा सरिस्ता करियै इसी तोड़ चाढ़ना ऐ तां जे मते शा मते लोक, हर इलाके च एहदे'नै जुड़न ते अजादी दे इस जश्न दा हिस्सा बनन।

<><><><><><>

NEP

राष्ट्री शिक्षा नीति 2020 भारती शिक्षा बवस्था च सुधार ते बेहतरी आहने लेई पुट्टेया गेदा इक ऐसा बदलाव दा कदम ऐ जेहदा सकारात्मक असर मुख्य भरै च दिक्खने गी लब्बा करदा ऐ। रामबन जिले च शिक्षा विभाग नै एहदे साबबे कई जागरूकता कार्यक्रमें दा सरिस्ता कीता ऐ जिंदे च व्यापक जानकारी, हुनर सिखलाई कार्यक्रम, शिक्षा गी लचीला बनाने लेई डिजिटल सेवाएं गी शामिल करना, विद्यार्थिणें दिएं जरूरतें पर केंद्रित शिक्षा प्रदान करने दी बवस्था, क्षेत्रीय ते मातृभाषा च पढ़ाना ते इस चाल्ली दे होर कई बदलाव जिले च आंदे गे न।

<><><><><><>